

DISQVIVITIONEM
DE
**INDOLE LEGIS PER-
MITTENTIS,**

SEV DE
PRINCIPIO ACTIONVM LICITARVM,
CONSENSV
AMPLISSIMI PHILOSOPHORVM ORDINIS
EXAMINI ERVDITORVM
SVBIIICIUNT




PRAESES
**M. HENRICVS GOTTLIEB
SCHELLHAFFER**

ET
RESPONDENS
**CHRISTOPHORVS LVDOVICVS
OBBARIVS**
THEOL. STVD.

LIPSIAE DIE XXV. MAII, A. MDCCXXIX.

LITTERIS BREITKOPFIANIS.



V I R I S

MERITIS IN SENATVM POPVLVMQVE
LIPSIENSEM CONSPICVIS

ILLVSTRI AC EXCELLENTISSIMO

D O M I N O

GODOFREDO LANGIO

POTENTISSIMI REGIS POLONIA-
RVM ET ELECTORIS SAXONIAE A CON-
SILIIS AVLAE ET IVSTITIAE, SVPREMAE CVRIAE
PROVINCIALIS, VT ET REVERENDI CONSISTORII
AC SCABINATVS ADSESSORI, REIPVBLICAE LIPSI-
ENSIS CONSVLI, TEMPLI THOMANI ANTI-
STITI MERITISSIMO, IVRECON-
SVLTO SVMMO

NEC NON

V I R O

CONSVLTISSIMO AC CELEBERRIMO

D O M I N O

**CHRISTIANO LVDOVICO
STIEGLIZIO**

POTENTISSIMI REGIS POLONIA-
RVM ET ELECTORIS SAXONIAE A CON-
SILIIS APPELLATIONVM, FACVLTATIS IVRIDIC-
CAE ADSESSORI, REIPVBLICAE LIPSIENSIS PRAE-
TORI, SCHOLAE THOMANAE ANTISTITI,
IVRECONSVLTO GRAVISSIMO

**DOMINIS AC PATRONIS SVIS
PIO ANIMO COLENDIS.**

HASCE
QVAE SVNT,
PHILOSOPHIAE PRIMITIAS
D.D.D.

SVMMVM NVMEN

PRECATVS

VT

II. QVORVM IN SALVTE AC INCOLVMITATE

SALVS CIVIVM LIPSIENSIVM

GLORIA SPLENDIDISSIMARVM FAMILIARVM

ATQVE

MAGNAE CLIENTVM TVRBAE TVTELA

VERSATVR,

SERO ASTRA PETANT,

PERENNIQVE FELICITATE SVAE VIRTVTIS

PRAEMIIS FRVANTVR,

ADDICTISSIMVS CLIENS

M. HENRICVS GOTTLIEB
SCHELLHAFFER.



CONSPECTUS:

- | | |
|---|--|
| §. 1. <i>Instituti rationem exponit.</i> | §. 9. <i>Titii exhibet.</i> |
| §. 2. <i>Grotii permissi definitionem;</i> | §. 10. <i>Titium refutat.</i> |
| §. 3. <i>Huius divisiones recenset.</i> | §. 11. <i>Quid per licitum intelligamus demonstrat.</i> |
| §. 4. <i>Boeccleri exempla ad Grotium adducta sub examen vocat.</i> | §. 12. <i>Distinctionem legum naturalium & civilium circa permissum indicat.</i> |
| §. 5. <i>Grotii sententiam de licito refert.</i> | §. 13. <i>Libertatem moralem destruit.</i> |
| §. 6. <i>Grotii errores.</i> | §. 14. <i>Nexum totius doctrinae docet.</i> |
| §. 7. <i>Eius Ἠθικὸν Ψυδὸν notat.</i> | |
| §. 8. <i>Pufendorffii sententiam;</i> | |

§. I.

Qui olim dissensus antiquas philosophorum scholas in disciplinae moralis principiis rite ponendis in varias distrahebat sententias: (a) eum & nostri aevi eruditos circa principia iuris naturae stabilienda vexare, nemini, cui cognitio iuris a ratione sibi relicta deducendi curae cordique est, incognitum esse putamus. Cum vero principiorum veritati totius systematis vis atque gravitas insit, operae pretium est, harum litium partem, quaecunque etiam placeat, suam facere, eamque luculentiori examine

(a) vid. Cicer. in Lib. de finib. Boni & Mali.

mine dignam censere. Quapropter neque nostrum consilium principii actionum licitarum, curatius examinandi L. B. displicebit, neque quicquam, quod benevolentiae magis adsequendae, quam veritatis adstruendae studium redoleat, addendum esse merito arbitramur. Ratio vero nostri instituti haec erit, ut recensitis Doctorum sententiis ea, quae veritati minime conueniunt, non sine argumentis, vel ex ipsorum dogmatum connexionem, vel ex vera legis natura depromptis reiiciamus, tandemque rationibus vndique collectis tritam de lege permittentem opinionem prorsus destruamus.

§. 2.

Grotius (a) triplicem iuris significatum ponit, quorum primum, qui ad nostram litem facit, iam exhibitori sumus. Vult nimirum magnus ille vir per ius denotari id, *quod iustum est negante tamen magis sensu, quam aiente, ut ius sit, quod iniustum non est.* Quae vltima verba differentiam, qua a caeteris distinguitur hic iuris significatus, perhibent. Aliud enim iuris nomen qualitatem personae inhaerentem ad aliquid iuste habendum, vel agendum (b) determinat, & ita respectu eo. quod competat personae, a nostro obiecto differt: aliud idem quod lex est, quoties vox legis largissime sumitur: non enim ad id modo quod iustum, sed & ad alias virtutes, quae extra iustitiam sunt

(a) vid. Grot. de iur. B. & P. Lib. I. §. 3. 4. 5.

(b) vid. Grot. l. c. §. 4.

sunt posita, vim suam extendit, atque ad omne, quod rectum est, obligare dicitur. (a) Hanc vero obligationem, quae ex hac iuris specie resultat, a permissione, respectu agentis, non tertii, quem utique ad non impediendum alterum obligat, abesse docet noster auctor. Haec vero est metaphysica Grotii dogmatum explicatio, quam, si disciplinalem requiras, hanc habes. Quicquid ex natura societatis fluit, illud iustum est ex iure, quatenus legem significat, & sensu aiente: quod si vero personae inherere, ut illa secundum istud aliquid ab altero exigere possit, e. g. si mandatarius a mandante, ut sibi indemnitatem praestet, requirat, ius est, quem secundo loco posuimus significatu. Quae autem actio ex societatis quidem natura non fluit, neque tamen ei est contraria, iusta est eo, de quo agimus, sensu. Inde iniustum Grotio dicitur id, quod e diametro societati ratione utentium est oppositum. (b) His ita expositis Grotianam definitionem, & minus claram, & minus adaequatam ad iustiore formam reducere haud inutile erit: neque tamen ut id, quod ipse auctor negatium tradit, affirmatiue pronunciemus, a nobis erit postulandum. Permissionem enim, proprie non actionem legis, sed actionis negationem dicit. (c) Est igitur ius permittens, seu in proprium (d) ius neque praecipiens, neque vetans, sed actiones libero

A 2

pa-

(a) vid. Grot. de Iur. B. & P. Lib. I. §. 9.

(b) vid. Grot. l. c. §. 3.

(c) vid. eund. l. c. §. 9.

(d) Vocabula enim cum non curemus, & aliorum terminis uti libet. Vid. Wesdenberg. principia iur. Tit. de l. & l. §. 58.

patrantis arbitrio committens, cum legis vis, cuius obligatio actionem vel iustam proprie, vel iniustam efficit, circa id plane cessat.

§. 3.

Ad cuius rei explanationem Grotii, quas addidit, divisiones, (a) perlustrare haud frustraneum erit. Permissionem nempe vel nudi facti, vel legis esse perhibet. Nudi facti vero dicitur: si quis, cuius est in potestate actionem aliter, quam pro ratione suscipientis dirigere, factum, quo impedire posset agentem, prorsus omittat: ita Deumi, cum penes eum stet hominibus vires ad patrandum scelus idoneas plane denegare, peccata non lege, sed facto permitt. re dicunt. (b) Lex enim actioni quidem impedimentum, sed futurum & consequens ponit; factum vero antecederet actionem impedire potest, e. g. si pater sub poena flagellorum puerio lasciuo prohibeat, ne se lubrico glaciei temere committat, puerum metu futuri mali deterret, & ita, ne factum patret, lege impedit: sin vero eum, ut domi sit, diligenter obseruet, atque, ne furtim custodiae domesticorum se subducat, solerter curet, facto & antecederet lasciuiae puerili resistit. Legis autem permissio est, si lex nihil plane agat, neque quicquam, quo actio impediri possit, praestet. Quae vltima nobis iam diuidenda venit. Est vero, vel plena, quae ius dat, ad aliquid omnino licite agendum, aut minus plena, quae tantum impunitatem apud homines dat & ius, ne quis alius licite actioni nostrae remoram iniicere

(a) vid. Grot. l. c. §. 17.

(b) vid. Osiandr. ad Grot. l. c. §. 9.

cere possit. Si enim circa actionem omne legum genus, siue diuinum, siue humanum sit, nihil determinat, omnino licite, siue omni ratione libere agere potes. In cuius rei illustrationem exempla adfert Boeclerus: (a) Primum, quod pro vsu pecuniae mutuo datae vel in damnum resarciendum, vel in lucri aliter captandi compensationem certam summam stipulari concessum sit: quippe quod non modo legibus humanis, sed & legi naturali, quae omne commodum ex alterius incommodo deriuare prohibet, minime contrariatur: secundum permissionem belli, quae & legi diuinæ positiuæ Deutr. XX, 10-15. & eidem legi ex recta ratione colligendae congruere perhibetur. Omnes enim leges cum in vnum conueniant, nihil, quod actionem illam illicitam reddat, adesse deprehendimus. Si autem actio quaedam tantummodo poenam legis humanae non contrahat, atque, vt quis, ciuilitate quidem, agentem licite interrumpere nequeat, ius ciuile sit, minus plene saltem illa permessa erit. Ita, vt quidem vult Boeclerus, b) furem impune occidere licet: ita iusto dolori lex indulget, vt pater quemcunque adulterum cum filia deprehensum, & maritus infamem tantum ac cognatorum libertum moechum e medio tollant. (c) Eadem denique ratione in seruum impune saeuire olim licebat.

(a) in Not. ad Grot. l. c. §. 17.

(b) *ibid.*

(c) l. 22. 23. & 24. ad .L. Iuliam de adult. coercend.

§. 4.

Quae quidem exempla a nobis recensita legas, ut tamen, tanquam accurate a Boeclero adducta, omnia probemus, veritas obstat. Primum enim minime ad ultimam permissionis speciem referendum censemus, cum potius prioris naturam ingrediatur. Etenim quamvis, ut Grotius docet, (a) priuato ius non sit alterum puniendi, nisi in tam graui delicto, ut mortem mereatur: ius tamen vitae & necis priuato non ob furtum, sed quoniam probabile vitae periculum adeat, dari, leges declarant. L. 4. ad leg. Aquil. enim rationem adducit naturalem, quod aduersus periculum naturalis ratio permittat se defendere, ac legem XII. Tab. tantummodo in eo casu, cum fur sit noctu deprehensus, et si interdiu cum telo necem eius probare refert (b). L. 9. ad leg. Corn. de Sicariis quoque addit, si furi nocturno sine periculo suo parcere non potuerit. Ex quibus omnibus patet non furtum, sed probabile vitae periculum a legibus respici. Remotis igitur, quae ex Grotii sententia ob stare possent, facile cognosces, non modo leges humanas impunitatem eiusmodi necis operari, sed eandem actionem iure diuino esse permisam: Hinc non minus plenae, sed plenae potius permissionis exemplum hic casus esse debet. Secundum vero, quod adfertur, propius equidem ad regulam accedere videtur, pauca tamen de hoc monuisse iuuabit. Quanquam enim verum sit, priuato, ut ius vitae & necis indistincte in alterum exerceat, non competere, nemini tamen non adparet,

(a) vid. Grof. de Iure B. & P. Lib. II. c. 1. §. 14.

(b) Conf. L. 4. §. 2. de furtis.

paret, hoc a iure, quod ille, penes quem summa imperii est, habet, dependere, ita, ut summus imperans in certis casibus illud pro utilitate reipublicae vel subditis concedere queat. Si igitur Augustus (a) *ere* Romanorum esse putavit tristi adfectui laesorum deprehensum moechum tradere vel, ut in atrox illud crimen eo seuerius animaduertat, vel ne Romani tantquam in hoc vindictae genus proniores nimis multipoenam luere cogentur, liberum ei fuit, iuris sui partem ciuibus largiri. Inde Romanis ius vitae & necis in moechum legibus & diuinis, & humanis erat permisum, & ita illorum actio plene permisa erit habenda. De tertio vero nihil mouemus. Maiestas enim, quae patri familias in liberos seruosque competeat, citra iurium ciuiliu obiectum erat posita. Quicquid igitur pater familias agebat, secundum regulas honestatis iurisque naturae exigere ei necesse erat. Hinc si quis iure suo in seruos abutebatur, saeuitiae quidem eius obicem non ponebant leges ciuiles, aequiorem tamen in eos animum requirebat commune animantium ius, ita, ut eiusmodi abusus permisus quidem, sed non plene, recte censeatur.

§. 5.

Superuacaneum foret Grotii sententiae longius immorari eiusque dogmata de licito accuratius examinare, nisi hanc materiam separatim tractare ipse instituisset. Duplicem enim liciti speciem noster auctor constituit (b), quarum una id comprehendit, quod rectum ex omni parte primumque est, etiam si aliquid fieri possit

(a) qui huius legis auctor l. 1. ad Leg. Iul. de adult. coercend.

(b) vid. Grot. Lib. 3. c. 4. §. 2. de I. B. & P.

possit laudabilius: altera id denotat, non quod salua pietate ex officiorum regulis fieri potest, sed quod apud homines poenae non subiacet. Vellemus sane Grotium non a variis speciebus, sed ab ipsius definitione liciti expositionem incepisse. Per licita vero eum intellexisse putamus, quibus, quo minus fiant, a lege impedimentum non ponitur. Non enim obstat, quod laudabilius sit actionem omittere, cum honestum nullum plane obligandi vim pro mente auctoris habeat: inde actio, quae alias recta piaque, siue legibus civilibus non contraria est, a principio honesti minime illicita redditur. Quamquam autem in eo a nostro dissentiamus, quod honesto obligationem denegat, quippe quae sententia, nisi consilia in iure naturae dari probes, admitti nequit: quod tamen caetera adinet, nihil mutamus.

§. 6.

Iam vero in nuda huius doctrinae recensione non acquiescimus, sed & quatenus veritati conveniat, disquirere operae pretium erit. Primo igitur regulas diuisionis non rite obseruasse bonum Grotium, caetera & eruditissimum, & celeberrimum adnotamus. Diuisioni enim ut accuratam obiecti diuidendi definitionem praemittamus, necessario requiritur: Quo vero in loco ius definitum sit, quod tamen in triplicem dispefcit classeni, nullibi adparet. Quapropter, quaecunque ei placuerunt, membra diuidentia ideae iuris subordinare potuit: cum fundamentum, ad quod referantur, neque vllum, neque determinatum adesceprehenditur. Alias enim termino iuris nihil aliud, quam quod a lege descendit, comprehendi potest. Quam autem defini-

tionem

tionem, si adplicare velis; nulla plane ratione tibi se probabit Grotiana diuisio. Aut igitur mentem suam, quid per ius intelligat, explicare nouamque definitionem fundamento ponere, aut suam diuisionem plane non adferre debuisset. Quod cum neglexerit neminem; vt suae sententiae subscribat, adducere potest. Porro si etiam auctoritati Grotii demus, vt nobis diuisionem pro lubitu suo adstructam obtrudat: minime tamen id erit ferendum, quod infinitae ideae certos atque determinatos effectus adscribere non dubitauerit. Vult enim permissionem, quam saltem non actionem definiuit, iustam actionem pariter ac legem efficere posse. Qua vero ratione, an effectus a causa, cuius natura te latet, & quam saltem, quae non sit, perspectam habes, dependeat, necne, vel si sagacissimus sis, indagare vales? Quod si quoque his omisissis certum aliquod ac definitum principium, quod actiones licitas dirigat, nempe libertatem naturalem, a Grotio esse adductum (a) concedamus: duplex tamen hinc oriatur quaestio. Prima, num haec libertas, secundum quam homo actiones suas pro suo arbitrio regere possit, in rerum natura existat. Secunda num hocce principium ad iuris naturae disciplinam, quae aut moralem turpitudinem, aut necessitatem actioni inesse docet (b), pertineat. Quarum prior plenior nostrum laborem infra (c) sibi vindicabit. Posterior vero vel ex hoc clarior euadet. Libertas naturalis nempe cum neque moralem turpitudinem, neque

(a) vid. Grot. de Iur. B. & P. Lib. 2. c. 2. §. 23.

(b) Eund. lib. 1. c. 1. §. 15.

(c) §. 13.

neque necessitatem actionis indicet, merito a iuris naturae disciplina, quae nos de hisce instruere debet, merito abesse traditur. Denique notam confusionis inter legem & permissionem ratione obligationis non effugiet bonus dormitans auctor. Obligationem a permissione abesse adfirmat: nihilominus tamen tertium, ne impedimentum ponat licite agenti, obligari dicit (a). Vnde quaeso haec obligatio? quae eius est origo? num a lege? sed huius vis in permissione plane nulla est, cum sit permissio actionis legis negatio: num ab alio principio? sed nulla datur praeter legem obligatio. Cui rei non parum lucis exemplum quoddam adlaturum esse nobis persuademus. e. g. si corpus impetatur in praesentem cum periculo vitae non aliter vitando, bellum est licitum etiam cum interfectione periculum inferentis (b). Iam vero unde oritur obligatio, ne quis alius me a defensione mei corporis per necem alterius retineat? nam lex ut defensionem mei suscipiam non adest; alias enim non licitum, sed iustum ac a lege praeceptum bellum dici debebat.

§. 7.

Hisce enodatis neminem fugere putamus, quantis difficultatibus doctrina de permissione laboret. Ne vero sine omni plane ratione a veritate aberrasse Grotium tibi persuadeas, principium, quod ei errorum causa fuit, indicare fas erit. Quanquam enim principium iuris naturae in actionis convenientia & disconvenientia eum natura rationali consistere doceat (c), facile tamen col-

(a) v. Grot. de I. B. & P. L. I. c. I. §. 9.

(b) v. Grot. L. 2. c. I. §. 3.

(c) Grot. L. I. c. I. §. 10.

Legis permittentis.

11

colliges per naturam rationalem nullam aliam, quam socialem, a Grotio denotari, ita, ut socialitas fons omnis iuris proprie dicti ei dicatur. Cum igitur multa se offerrent, quae ex socialitate deduci non poterant, aliud quoddam principium in supplementum prioris adsumebat. Quod, cum legis naturam, unica enim lex socialitas est, non ingrederetur licitum, id est, iustum ab obligatione destitutum dici volebat. Neque vlla ratione, siquidem socialitatem pro primo principio iuris naturae habeas, Grotio tamen in omnibus assentire nolis, tibi constare poteris. Iam vero cum ad principium primum alicuius disciplinae necessario requiratur, ut, & vnum, & adaequatum esse demonstretur, de socialitate quod primum sit, iuris naturae principium non sine causa dubites. Vnum enim si esset, minime ei permissionem, quae ex libertate naturali originem trahit, adiungere par est: neque, si adaequatum esset, omniaque exinde fluere, aliud principium in supplementum adstruere necessitas iuberet. Quod si igitur eiusmodi principium iuris naturae, quod requisitis, quae prima principia constituunt, accuratius respondet, adfirmare haud verearis, & permissioni valedices, & quaecunque tibi obveniunt, ex lege deducere poteris.

§. 8.

Iam ad Pufendorffii sententiam explicandam peruenimus, qui cum Grotio quam maxime sit consentiens, Grotianz sententiae expositio hic nobis compendium facit. Convenit enim in definitione. *Nam permissio inquit (a), proprie non est actio legis, sed actionis*

B 2

nega-

(a) vid. Pufendorff. I. N. & G. Lib. I. c. 6. §. 15.

negatio. Quae lex permittit, illa neque praecipit, neque vetat, adeoque circa eadem nihil agit, quippe cum alias, quae neque vetantur, neque praecipiuntur, in cuiusvis arbitrio posita intelligantur. Et sic permessa ac licita sint, etsi lex nullam eorum mentionem fecisset. Conuenit porro in principio permitti, nempe quod illud sit libertas naturalis, uti ex hisce verbis patet (a). Si accurate velimus loqui, neque iste effectus (vt ne alius licite agentem impedire possit) proprie ex permissione legis resultat, sed ex propria cuiusque libertate. Circa quae enim lex mihi impedimentum non ponit, circa eadem libertate gaudeo. Cuius hic praecipue est effectus, vt ne quis mihi innoxium eiusdem exercitium turbet. Denique quod ad diuisionem pertinet, eandem cum Grotio permissionis in plenam & minus plenam adfert. Minus vero plenae permissionis subdiuisionem addere ei placuit. Eam enim, inquit, aut impunitatem dare a poena aut libertatem ab impedimento, aut utrumque. Cuius diuisionis, si protulisset fundamentum, haud paruum robur sententiae suae addidisset. Videtur vero illorum suffragari opinioni, qui minus plenam permissionem impunitatem quidem, ne tamen alter nostram actionem impedire possit largiri tradunt, ita volunt maritum uxorem in adultério deprehensam impune occidere, sed alteri, vt ab ista internecione maritum retineat, liberum relinquunt, quibus tamen nostrum calculum non adiciamus. Lex enim si impedimentum remoueat, minime priuato licet sine auctoritate legis actionem impedire. De facto igitur id quidem facere potest, nulla vero ratione de iure. Inde nihil in Grotiana sententia, quae & impunitatem a

poe-

(a) Eund. l.c.

poena; & libertatem ab impedimento a permissione minus plena praestari docet, immutandum censemus: Neque Pufendorffii auctoritas diuisionem absque fundamento adstruentis alia nobis persuadebit. Cacterum diuisionis, quam de permissione legis ciuilis vel expressa, vel tacita adiecit celeberrimus Vir, cum ad scopum specialiore faciat, mentionem inieciisse satis erit. Noui igitur cum nihil a Pufendorffio adferatur, ea, quae ad Grotium admonuimus, sufficient, longioreque eius dogmatum refutatione merito supersedemus, haec saltem adnotantes: permillum ac licitum eodem significatu nostro auctori venire ex ipsius doctrina patefieri.

§. 9.

Non diutius tempora tua moramur recensendis Seldeni, Thomassii aliorumque sententiis, quae nihil quod Grotio contrariatur, proferunt, ita, vt peculiare examen minime mereantur. Titius igitur vna cum affeclis suis (a) nobis restat, cui, cum sententiam caeteris plane contrariam defendat, merito singularem operam addicimus. Permissionem enim, quam caeteri a legis actione non dependere tradunt, legi adscribit, & inde fundamentum legem in obligantem & permittentem diuidendi habere putat. Ita vero legem permittentem ei definire placuit, quod sit *decretum, quo imperans sibi subiectis ius dat, aliquid, si velint, licite ac tuto habendi, agendi, vel ab aliis postulandi.* (b) In eo igitur cum caeteris consentit, quod actio ex iure

B 3

per-

(a) quorum primus dici meretur Barbeyracius, nisi cum Titii expilatorem nominare mauis.

(b) vid. Titii obseruationem §1. ad Pufendorff. de O. H. & C.

permissiuo descendens libero arbitrio agentis sit commissa: in hoc vero dissentit, quod haec permissio a lege proueniat. Quam opinionem hocce argumento corroborare voluit, (a) duplicem nempe legis effectum esse docet, obligationem scilicet & ius. Inde obligationem tribuit legi obliganti; ius vero legi permittenti, & ita effectum de causa testari refert; atque sicuti, ut agas ab illa; ita, ut secure agas, ab hac dependere illi videtur. Cum vero sibi quaedam obistere videret, ea hac ratione remouere conatus est: (b) cum, ut permissionem non actionem, sed actionis negationem esse aliquando, sed non semper concedat: quippe cum concessio iuris ac praecipue singularis posituitatem permissionis satis ostendat; tum, ut, quod obligatio de legis essentia sit, ex nimis stricto legis conceptu suppositum esse doceat: quod sane vltimum effatum, ut a tanto viro prolatum non esset, pro eo, quo in huius viri celeberrimii dogmata ferimur, adfectu pio animo exoptamus.

§. 10.

Verum enim vero, ne in Titii sententiam eamus, sequentes rationes in causa fuerunt. Argumentum enim, quo tota nititur sententia, minime firmo superstructum est fundamento. Vult nempe ius testari de sua causa, quae lex permittens sit, sicuti obligatio de lege obligante testimonium exhibeat: vbi tamen bene considerare debuisset ius ac obligationem esse correlata ab una iisdemque circumstantiis persistente causa, non vero diuersos effectus a diuersa causae constitutione productos. Alia enim

(a) vid. eius Obseruat. 50. ad Pufend. de O. H. & C.

(b) vid. Tit. l. c.

enim horum ratio est, quam quae in lege percipiente & prohibente obtinet: Nam hae oppositae sunt, non vero correlatae, ac ab vna quidem causa, sed diuerso modo se exferente praeceptio ac prohibitio proficiscitur. Non igitur diuersus est actus, sed vnus idemque, qui obligationem & ius producit. Quae enim lex Sempronio ius dat, vt monopolium exercere possit, illa eademque Maecio necessitatem imponit, ne & earum mercium, quarum venditio soli Sempronio est concessa, mercaturam instituat. Ex quibus abunde patet, obligationem & ius de causa quidem, sed non de diuersa testari, quo fit, vt omne fundamentum diuidendi Titio corruat. Neque meliorem se gessit in reiiciendis aduersariorum opinionibus. Instantia enim, quam de priuilegio adfert, vt quandoque permissionem a legis actione dependere probet, locum habuisset, si lex tantummodo ciuilis fuisset diuidenda, cum vero hic de omni legum genere earumque virtutibus sit sermo, sententiae, quod permissio legis naturalis magis ab actione, quam a non actione legis dependeat, nihil ponderis ex instantia adducta adcedit. Inde non omnem vim obiectio, vt sibi persuadet Titius, per distinctionem inter quandoque & semper amisisse videtur. Porro petitionis principii, cuius alios arguit, ipse fit reus. Aduersarii nimirum non sine ratione opponunt, ad legem obligationem esse necessariam. Lex enim est voluntas, siue quod idem est, pro sententia auctoris decretum: Voluntas vero recte adfectio mentis, qua ad aliquid impetrandum tendimus, dicitur. Si igitur alteri liberum sit, an velit suas actiones ad nostra praecepta componere, nec ne, necessario voluntatis vis vana est, quod
tamen

tamen de lege non erit adstruendum. Neque saltem lis de nomine nobis cum Titio intercedit. Cum enim legem per decretum definire voluerit, liberum ei non fuit ideam decreto plane contrariam definitioni admiscere. Quae etiam de legis etymologia, quod illa ab eligere sit deducenda, opponi possunt, vel nihil, cum non de verbo, sed de idea controuersia sit, ad rem faciunt, vel ex simplici veterum loquendi more, quippe quos non obligationem, sed ligationem, inde a ligando & ligendo (a) legem dixisse probabile est, valde incerta redduntur. Denique si fundamentum erroris indicare debeamus, ne forsitan cum confusionis legum ciuiliū & legum in genere considerandarum insimulare cogamur, veremur: a quo facto tanti tamque praestantis verae iurisprudentiae auctoris merita nos retrahunt.

§. II.

Expositis igitur aliorum dogmatibus, ad ea, quae nostram sententiam constituunt, progredimur. Per actionem vero licitam ac permissam eam intelligimus, cui a lege nullum impedimentum ponitur, ita ut si eam suscipias, nemo te impedire possit. Siue igitur actio a lege sit determinata, siue plane omissa, vtrique habetur licita. Nam quae possumus (b) agere, ea siue vim addat lex, atque non modo non impedimentum ponat, sed etiam impedimenta, quae ab aliis existere possunt, remoueat:

(a) vid. Salmas. ad Vopisc. Aurelian. c. 4.

(b) Nam per posse recte interpretamur licere, quod fecit egregius, cuius fama per exterorum ora volitat, Lucani interpres in indice minori Lucani editioni adiecto, ad Lib. 4. v. 638. - - - nunquam saeuere sperare nouercae Plus licuit - - -

ueat: siue nihil agendo nullum effectum producat, licita perinde dicuntur. Inde iusto non opponimus licitum, sed potius id, quod lex iubet, licitum dici debet. Ita Geta apud Terentium (a) recte dicit: *Si uxorem velit, lege id licere facere*: cum cuius sit Attica: matrimonium autem cum ciue contractum lex probat. Hic igitur, si tibi placet, liciti significatus, licitum ac permisum pari passu ambulat, nisi quod eadem actio ratione agentis licita, ratione legis permessa dicatur, ita, ut saltem nominalis, non vero realis se exserat differentia: sin autem permissorum naturam, a sola legis non actione siue a libertate naturali deriuare mauis, vel secundum ipsum Grotium permessa & licita tibi diuersa erunt.

§. 12.

Iam vero perspicies pro nostra quidem sententia duplicem esse permissionis rationem. Altera enim est negatiua, ubi lex nihil agit, altera positiua, ubi lex impedimenta remouet, aliosque, ne agentem turbent, obligat. Vltima tam diuino, quam humano iuri competit, ea tamen distinctione, ut, quae actio secundum ius naturae est licita, necessario sit suscipienda; quam vero leges ciuiles permittunt, eius directio committentis arbitrio sit relicta. Dantur enim actiones, quarum finis extra obiectum, quod leges ciuiles comprehendunt, est positus: inde cum vel a principio honesti, vel a specialiori cuiusque statu actiones istae dependeant, a lege ciuili, quae & externarum tantummodo actionum, & omnium, non singulorum subditorum norma, cur, quandoque sint suscipiendae, non determinari possunt.

C

(a) vid. Phormionem Act. I. sc. 2. v. 65.

sunt. Cum autem reipublicae interfit, ne earum exercitium turbetur lex hypothetice circa illas agit, id est, actiones non absolute instituendas praecipit, sed, si quis ita agere sibi conducere putet, eius actionem legi convenientem reddit, modumque, in quo persistere debeat, ponit, ne quis ei vel ex lege, vel libere remoras causetur, id quod celeberrimus Titius persecute agere recte indicavit. Ex quo etiam adparet, quid sibi voluerit Modestinus (a) cum inter legis virtutes $\tau\epsilon$ permittere referat, cuius tamen luculentiorum explanationem Iurisconsultorum scholis merito seruamus. Ius autem naturae, cum natura sibi quemque commendet, omnes, ad quosunque vires intendere valeant mortales, fines comprehendit, quo fit, ut omnes actiones absolute praecipiat, & nihil, quod non praeceptum sit, permixtum licitum recte habeatur. Quod vero permissionem negatiuam attinet, illam quidem ex ratione iamiam adducta a iure naturae plane abesse iubemus, legibus tamen ciuilibus minime denegamus. Illae enim, cum homines tantummodo externe coerceant, necessario actiones internas liberas relinquunt easque ciuilitate quidem licitas esse sinunt.

§. 13.

Qua autem distinctione inter leges naturae, ac ciuiles circa permissionem negatiuam vsi sumus, eiusdem utilitas iterum in diiudicanda existentia libertatis naturalis se exserit. Libertatem enim naturalem, si statui ciuili opponitur, dari ipsi adferimus: quod autem eadem ipsa natura, ex qua voluntatem Dei, quae lex est, colligimus, statum, in quo homo sine lege suo tantummodo

genio

(a) l. 7. de legibus.

genio indulget, suppeditet, nobis certe perspicere datum non est: neque tamen spontaneitatem, quam vocant, quae homo suarum actionum auctor est; neque libertatem, ut & secundum, & contra legem actiones suas dirigere possit, mortalium generi denegamus. Si vero regeras, hominis actiones non quidem semper legi subesse, neque tamen consilium Dei circa illas plane cessare. Quanam quaeso ratione consilium in Deum imperantem cadere potest? Amicus enim, cui proprium est consilia dare, suam voluntatem quidem declarat, potestate vero alterum ad id, quod voluit, faciendum cogendi non gaudet, & ita imperfectione quadam laborant eius effata. Deo vero, a cuius potentia & omnia, & humana natura dependet, istam imperfectionem tribuere piaculum erit. Aut igitur summum numen non est solus hominis auctor, aut omnes mortalium actiones sua voluntate determinat, nihilque quod rectum est, non sponte Dei facimus. Damus quidem, quandoque leges diuinas quoad modum proponendi consiliorum speciem prae se ferre, qui tamen modus ipsam rei naturam mutare nescit. Patet porro & a posteriori nostrae sententiae veritas. Omnis actio ab effectu vel bona vel mala est. Nam indifferens ratione agentis, nisi voluntatem ab actione, cuius tamen est causa, remoueas, non datur. Bona autem est, si effectum nostrae constitutioni conuenientem producat; mala, si contrarium, qui & poena dicitur, operetur. Vtrumque vero a natura, quae est dispositio Dei rebus insita, dependet. Natura extra voluntatem Dei nulla est: Voluntas Dei vero lex, inde omnes actiones legi diuinae subunt. Destructo igitur aduersariorum liciri principio,

cipio, non dari actionem licitam, quam alii describunt, in iure naturae duce veritate nobis concedes.

§. 14.

Verum enim vero cum id inprimis haecenus actum sit, vt, aliorum sententiae quam minime veritati sint congruentes, doceremus, facile euenire potest, vt nostra sententia carptim saltem proposita paulo obscurior Lectori videatur. Quod vt euitemus nexum nostrae doctrinae argumentis collectis breuiter tibi exponere adgredimur. Primo igitur quoad permissionem leges naturales & ciuiles quam maxime sunt distinguendae. (a) His enim quod damus illis concedere minime fas erit, aduersarii vero nostri non modo legi ciuili indistincte sed & iuri naturae permissionem, tribuere laborant. Porro de lege, quod sit principium actionum licitarum, non erit adfirmandum, cum idea voluntatis, quae a lege separari nequit, hanc opinionem plane non admittat. (b) Denique neque ex libertate naturali licita erunt adstruenda, libertatem enim physicam homini competere ambabus manibus largimur, moralem vero vt adferamus, nulla ratione adducimur. (c) Quod vero principium actionum licitarum detur, cum neque a lege, neque a libertate, deduci queant, nos certe latet. Deficiente igitur principio actiones licitas eo scilicet quo a iustis differunt sensu, e iure naturae exulare iubemus. Haec habeas de lege permittente B. L. & si forte nobis vitio ducas, quod non omnium, qui ad hanc materiam animum adplicuerunt, nomina relata legas, scire te volumus, nos neque vasta ac saepe plane inutili auctorum constipatione aliis praestare studere, neque aliis, si nostris aliquid addi libet, inuidere: Cum nobis arctioribus consilii nostri limitibus consuluisse fatis sit.

(a) de quo pluribus egimus §. 12.

(b) quod demonstrauimus §. 10.

(c) vid. plura §. 13.

